

Un ricuart semiseri di Marzi

G I A N P I E T R O Z A C C O M E R

Nol è facil scrivi in pocjîs riis di une cognossince academiche durade sù par jù 25 agns cul Prof. Marzi Strassolt. Par jessi precîs, dopo une piçule ricercje tal Archivi de Didatiche de Universitât dal Friûl, o ai viodût che o ai fat l'esam di Contabilitât Economiche Nazionâl tal mêis di Març dal 1990 e duncje o ai cognossût Marzi dilunc des leziions dal semestri prime. E di chel moment il nestri rapuart si è insaldât une vore fin che lui al è jentrât in politiche, po lis nestris stradis si son dividudis, par tornâ a cjatâsi dome tai ultins agns cuant che al è tornât a insegnâ tal cors avanzât di Statistiche Economiche. Cuant che mi àn clamât a presentâ il profil pal so pensionament no ai rivât dome a elencâ, in maniere impersonâl, lis sôs miôr publicazions propit par vie che o vevi cetancj fats curiôs di contâ: pontâ la atenzion dome sul studiôs e no sul om, cun dutis lis sôs cualitâts e i siei difiets, mi somee masse pôc. Al è clâr che, stant che mi cognosseve, Marzi si metè in vuaite, o ben cualchi zornade dopo, mi confessà che al sperave che a vessin sielt me par chel compit stant che al veve pôre di sintî a lei il so curriculum studiorum cu la stesse enfasi di un che al lei l'elenc dal telefon. E jo, cence savê, lu vevi contentât par vie che o contai plui i siei difiets e lis sôs manîs che no la sô produzion sientifiche. O scuén dî che chel “profil cence creance” al plasè une vore, ancje se tal public a jerin cuasi ducj academics e autoritâts... ancje par vie che a jerin siet di sere!

Dal pont di viste dal dut personâl, Marzi al è stât par me un docent model, simpri coret, clâr tes sôs spiegazions, logjic tes sôs deduzions, precîs a nivel maniacâl, che al dave impuartance ae dimension umane

tal rapuart interpersonal cui students. Al è clâr che cualchi piçul difiet lu veve ancje lui, soiredut il nivel monoton de sô vòs che, dopo gustât, al podeve meti in dificolât i students, tant che lu clamavin “Marzio Strazio”. Cualchi an dopo i elencai ducj i sorenons che i vevin dât i students e no dome al ridè, ma al volè che lu tignîs informât di eventuai gnûfs sorenons che i vessin dât. Ce che o ai pene contât al podarès vierzi il cjapitul sul *sense of humor* di Marzi: la vere rivelazion di chestis memoriis e je che lu veve, pardabon, ma al lave capît e un pôc stiçât! Soiredut cuant che i fasevin biei scherçs, come chel de professore Gräfenberg. Magari al reagìve cun un pôc di ritart e cun distac studiât, fasint ancje fente di no capî, ma il dì dopo si capive che il scherç i jere plasût parcè che lu contave, divertît, ai siei colaboradôrs plui strets.

Pe cronache, i scherçs ju tornave ancje indaûr: al veve inventade une strambe teorie sui “enzimis furlans” dal fiât dome par fâmi capî che no i plaseve che o jeri astemi, dilunc des cenis organizadis de sô bande atôr pal Friûl, cence dispreseâ lis gasthaus di savôr austroongjarês. Cualchi an dopo dal esam mi clamà tal so ufici, pôc prime di diventâ retôr (o Magnific Reatôr come che al jere scrit intune letare che i jere rivade e che al diventâ, *ça va sans dire*, un gnûf sorenon di zontâ te liste), par domandâmi se mi interessave disvilupâ une tesi sot de sô supervision tal ambit di un proget energjetic regionâl. O ai vude cetante braure di chest, no dome pal ricognossiment che al dave al gno percors academic (mi veve schedât: intune cartelute smavide al veve scrit, dut a lapis, la mê medie e ducj i vòts singui cjapâts tai esams cuantitatîfs, e mancjave dome une foto segnaletiche), ma ancje par vie che si jere impensât che o vevi studiât eletrotecniche al “Malignani”, duncje al pensave che o las ben par une tesi di chê fate, robe che nancje jo mi visavi di vêi dit. Ma lui si lu impensave par vie che al jere simpri atent ai siei students e, soiredut, al jere simpri daûr a cirî zovins prometents di segnalâ cuant che cualchidun i ves domandât nons par une possibile assunzion. Dopo de tesi al vignî il dottorât in Statistiche cuntun orientament teritoriâl come che nus plaseve a ducj i doi, e po il proget sui carburants regionâi, e po... cetantis altris storiis (e cualchi altri piçul scherç).

Ce mi restaria al di plui di Marzi? A part i siei mitics post-it zâi cu la sô grafie stilizade e personalissime che a vegnin fûr inmò dai miei libris

vieris e dai miei documents (in Retorât a 'nt vevin un armâr plen stant che a 'nt consumave a cuintâi), soledut l'agrât par vêmi fat di vuide tai prins tims tal mont academic, ma ancje il marum di no vê mai cjapât di lui la capacitât di jessi cuiet e ecuibrât, o almancul di someâ di jessilu, soledut tai moments plui dificii. Come che si dîs: siôrs si nas!

P.S. A son zaromai agns che no soi plui astemi. O ai ancje scrit un libri su la economie dal vin in Friûl cun Marangon. Daspò de presentazion, devant di un bon tai di cabernet franc, Marzi nol pierdè ocasion di cjolmi vie pal gno passât, di altre bande ... i vevi dade la ocasion di fâlu suntun plat di arint.